



SIARAN AKHBAR

Diterbitkan Oleh Jabatan Penerangan Malaysia

PERKARA
BERNAMA

PEN. 6/90/33(PM)

UCAPAN YAB PERDANA MENTERI
DATO SERI DR MAHATHIR BIN MOHAMAD
MENGENAI USUL UCAPAN TAKZIAH ATAS KEMBALINYA
KE RAHMATULLAH YANG AMAT BERBAHAGIA TUN HUSSEIN ONN
DI DEWAN RAKYAT
PADA HARI ISNIN, 11HB JUN 1990
PUKUL 3.30 PETANG

Tuan Yang Dipertua,

Saya memohon mencadangkan:-

"Bahawa Dewan ini merakamkan perasaan sedih yang amat sangat di atas kembalinya ke Rahmatullah Yang Amat Berbahagia Tun Hussein Onn, bekas Perdana Menteri Malaysia pada 29 Mei 1990 dan menyampaikan ucapan takziah kepada Yang Amat Berbahagia Toh Puan Suhailah binti Tan Sri Mohd. Noah dan keluarga Allahyarham".

Tuan Yang Dipertua,

2. Seluruh rakyat Malaysia amat terkejut menerima berita kembalinya ke Rahmatullah Yang Amat Berbahagia Tun Hussein Onn, pada hari Selasa, 29 Mei tahun ini. Sesungguhnya dengan kembalinya Allahyarham ke Rahmatullah, negara telah kehilangan seorang pemimpin dan negarawan yang terhormat kerana pengorbanan dan perjuangan Allahyarham dalam bidang politik dan pentadbiran merupakan sumber inspirasi dan teladan kepada rakyat.

3. Kepimpinan beliau sebagai Perdana Menteri ketiga amatlah disegani dan dihormati oleh rakan-rakan seperjuangannya, dari parti UMNO khasnya dan parti-parti komponen Barisan Nasional amnya. Allahyarham adalah seorang pemimpin yang cintakan keamanan, sentiasa tegas, teliti dan berhati-hati semasa membuat keputusan. Atas sifat-sifat kepimpinan Allahyarham yang tegas, jujur, ikhlas dan memahami akan masalah rakyat itu, beliau telah mendapat sanjungan semua golongan rakyat daripada berbilang kaum dan semasa hayatnya beliau telah diberi gelaran sebagai "Bapa Perpaduan".

4. Allahyarham dilahirkan di Johor Bahru dan telah mendapat pendidikan Sekolah Inggeris. Semangat keperwiraan beliau mula terbukti apabila semasa remajanya, Allahyarham

meneeburi dalam bidang ketenteraan. Di samping itu, Allahyarham mula bergerak cergas dalam politik pada tahun 1946 dengan menganggotai Pergerakan Melayu Semenanjung yang kemudiannya menjadi sebahagian daripada UMNO. Semasa umurnya meningkat 28 tahun beliau dipilih sebagai Setiausaha Agung UMNO yang pertama.

5. Dalam tahun 1970, Allahyarham Tun Hussein dilantik menjadi Menteri Pendidikan. Pada tahun 1973 pula, Allahyarham dipilih menjadi Timbalan Presiden UMNO dan dilantik menjadi Timbalan Perdana Menteri berikutan kembalinya ke Rahmatullah Allahyarham Tun Dr. Ismail. Allahyarham kemudiannya menjadi Perdana Menteri setelah Allahyarham Tun Abdul Razak meninggal dunia di London pada 14 Januari 1976. Semasa Allahyarham Tun Hussein menjadi Perdana Menteri banyak perubahan dan kemajuan telah dicapai. Allahyarham Tun Hussein telah meletak jawatannya sebagai Perdana Menteri pada bulan Julai 1981, setelah memegang teraju pemerintahan negara ini selama lebih 5 tahun.

6. Semasa hayatnya Allahyarham bergiat cergas dalam kerja-kerja amal dan kebajikan. Antaranya, Allahyarham adalah Presiden Persatuan Orang-orang Buta Malaysia dan Pengerusi Hospital Mata Tun Hussein Onn. Atas khidmat bakti dalam kerja-kerja amal dan kebajikan itu juga, Allahyarham

telah diberi penghormatan menerima Anugerah Tertinggi Persatuan Bulan Sabit Merah Malaysia, iaitu Anggota Kehormat seumur hidup, pada tahun 1984.

7. Walaupun Allahyarham telah bersara daripada jawatan Perdana Menteri, beliau terus mencurahkan tenaga untuk berkhidmat kepada masyarakat dan negara. Allahyarham telah dilantik menjadi Penasihat PETRONAS, dan Pengerusi Institut Kajian Strategik dan Antarabangsa atau ISIS. Allahyarham memegang kedua jawatan tersebut sehingga akhir hayat Allahyarham. Di samping itu Allahyarham pernah juga memegang jawatan Presiden Majlis Universiti Islam Antarabangsa.

8. Atas jasa beliau kepada negara, Allahyarham telah dianugerahkan Darjah-darjah Kebesaran Persekutuan dan Negeri. Allahyarham telah dianugerahkan Darjah Kelas Pertama Seri Maharaja Mangku Negara (S.M.N.) yang membawa gelaran "Tun" oleh Duli Yang Maha Mulia Seri Paduka Baginda Yang Di Pertuan Agong.

9. Sesungguhnya kembalinya ke Rahmatullah Yang Amat Berbahagia Tun Hussein Onn amat dirasai oleh rakyat yang cintakan perpaduan dan keharmonian di dalam negara ini. Kembalinya ke Rahmatullah Allahyarham merupakan peristiwa

yang amat sedih dan terharu kepada balu dan anggota-anggota keluarga Allahyarham. Saya bagi pihak Kerajaan berharap keluarga Allahyarham akan tabah hati serta bersabar di dalam menghadapi peristiwa yang sedih itu. Saya berdoa semoga Allah Subhanahu wa Ta'ala mencucuri rahmatNya ke atas roh Allahyarham.

Tuan Yang Di Pertua,

Saya mohon mencadangkan.

Kuala Lumpur.
11hb. Jun, 1990,
Jam: 6.00 petang.